

Dielangana dia Meji pa Lumu Luimpe lua Yone

No. 23

Yesu udi ubuela mu Yelushalema ne butumbi

Pakatshiabu, bantu ba bungi bakadi balue ku disanka, pakunvuabo ne, Yesu ulualua ku Yelushalema, bakangata malala a mabue, bakalupuka bua kusangila nandi, bakela mbila ne, Hosana; udi ulua mu dina dia Mukelenge, Mukelenge wa Isalele mene, udi ne disanka. Pakasangana Yesu muana wa mpunda, wakashikama pa nyima pandi, bu muakafundabo ne, Muana mukaji wa Siona, kutshinyi; mona, Mukelenge webe ulualua mushikame pa nyima pa muana wa mpunda (Yone 12:12-15).

Bantu ba bungi bakadi balue ku Yelushalema bualu bua disanka dia Kupita kua Yehowa. Mukelenge Yesu wakashiya Betania mu dinda ne bayidi bandi bua kuya ku disanka kabidi. Mu njila, bayidi bandi bangata nyama wa mpunda ne muana wende, bakateka bivualu biabo pa nyima pa muana wa mpunda, Yesu wakashikama pa nyima pandi. Bantu ba bungi bakunvua bualu bua Yesu ne kubisha kua Lazalo mukatshi mua bafue, bakasangila nandi bua kubuela mu Yelushalema. “Bantu ba bungi ba mu tshisumbu bakadija bivualu biabo mu njila; bakuabo bakakosa bisala bia mitshi, bakabiadija mu nshila” (Matayo 21:8). Yone udi utuambila ne, Bantu bakangata malala a mabue.

Bantu bakela mbila ne, “Hosana; udi ulua mu dina dia Mukelenge, Mukelenge wa Isalele mene, udi ne disanka”. (“Hosana” En Hébreu: Sauve, je te prie. D'où : Gloire ! Exclamation de joie et de bien venue). Matayo udi utuambila ne, “Bualu ebu buakulua bua kushikija diyi diakambabo kudi muprofete ne, Nuambile muana mukaji wa Siona ne, Monayi, Mukelenge webe ulualua kuudi, udi ne kalolo, udi wenda pa nyima pa mpunda” (Matayo 21:4,5. Tangila Zekaya 9:9).

Diba kadiena muanze kulua bua Yesu kujadika bukelenge buende pa buloba

Yesu wakabuela mu Yelushalema mu butumbi, diakadi dituku dia Lumingu. Pakalua dituku ditanu, “Dilongolola dia Kupita ku Yehowa diakafika, diba diakadi bu munda munya. Yeye [Pilato] wakambila Bena Yuda ne, Monayi Mukelenge wenu ! Bakela meyi abo bikole ne, Umumushe, umumushe, umushipe ku mutshiamakane ! Pilato wakabakonka ne, Nshipe Mukelenge wenu, anyi ? Bakuidi banene bakamukudimuna ne, Katuena ne mukelenge mukuabo anu Kaisa” (Yone19:14,15). Bena Yuda bakakoma Yesu nyima, bakalomba Pilato bua kumushipa. Bakuidi banene bakadi basanka bua Bena Lomo mu Isalele ne muaba wabo muinshi mua bukokeshi buabo.

Musangu mukuabo bayidi ba Yesu bakela meji ne yeye wakadi pa buipi bua kujadika bukelenge buandi. Mukelenge wakamana kubambila ne, “Unvuayi, tudi tubanda ku Yelushalema; nebafile Muana wa muntu mu bianza bia bakuidi banene ba Nzambi ne bafundi; bobo nebamupishe ne lufu, nebamufile mu bianza bia bisamba ba bende; bamuseke, bamutuile mate, bamukume, bamushipe; kadi papita matuku asatu, yeye neabike kabidi” (Mako 10:33,34).

Bena Isalale bakadi muinshi mua bukokeshi bua Lomo. Bakalambula Kaisa, mukelenge wabo, milambu. Musangu mukuabo bantu ba bungi mu tshisumbu bakadi balonda Yesu bakadi ne ditekemena ne, Yesu neatusungile mu bianza biabo. Kadi Yesu, muena kalolo ne kanemu, kakadi mulue bua kupita bena lukuna ba Isalele bukole, wakabuela mu Yelushalema pa nyima pa muana wa nyama wa mpunda, kakabuela pa nyima pa kabalu ka mvita. Mukelenge Yesu wakamanya mitshima ya bantu, mu matuku makeke bobo, balombodibue kudi Satana, nebakebe lufu luende. Diba kadiakadi dianze kulua bua

kujadika bukelenge buende. Yone wakafunda bua dituku adi ne: “Nakatangila diulu dibululuke; ne mona, kabalu katoke, ne wakadi ushikama pa nyima paku wakabikidibua ne, Wa Kueyemena ne Mulelela; ne mu buakane buandi udi ulumbuluisha ne udi uluangana nvita” (Buakabuluibua 19:11). Palualua dituku adi, Mukelenge Yesu nealue ne bukole butambe bunene ne bena mvita ba mu diulu, Satana, muena lukuna wa Nzambi ne wa bantu, neikale musuikibue bidimu tshinunu (Buakabuluibua 20:1,2).

Yesu udi ushikama pa nyima pa muana wa nyama wa mpunda

Mbidi bimpe bua kubambisha ne, Mukelenge Yesu wakashikama pa nyima pa muana wa nyama wa mpunda, muntu kakadi muanze kushikama pa nyima pende (Mako 11:2). Bantu badibo nabo mbua kuyisha nyama, bu nyama wa mpunda, bua kutuala majitu diambedi muntu udi mua kushikama pa nyima pende, kadi muana wa nyama wa mpunda ewu wakamanya Mufuki wende !

Dituku dikuabo Yesu ne bayidi bandi bakadi mu buatu pakalua tshipupu tshikole. Bayidi bakatshina ne, Tudi tufue, kadi Mukelenge Yesu wakambila dishiba ne, “Pua, talala talalaa. Lupepele luakalekela, muaba awu wakatalala talalaa”. Bayidi bakambilangana ne, “Ewu muntu kayi ? Lupepele ne mayi a dishiba bidi bimunvuila” (Tangila Mako 4:35-41). Message wa muanjelo wa Mukelenge bualu bua kuledibua kua Yesu wakadi ne, “Nebamuidike dina ne, Imanuele, kuandamuna kua muaku ne, Nzambi udi netu” (Matayo 1:23). Yesu wakadi munkatshi muetu bu muntu mene (1 Timote 2:5), kadi malu aa akajadika Bunzambi buende.

Bakuabo bakitabuja Yesu bu Muana wa Nzambi kadi Bena Isalele, bu tshisamba tshia bantu, kabakamuitabuja. Yone wakafunda bualu bua Yesu ne, “Wakalua kudi bintu biandi, kadi bantu bandi mene kabakamuitabuja. Yeye wakapa bonso bakamuitabuja bukole bua kuluabo bana ba Nzambi, bobo mene badi bitabuja dina diandi” (Yone 1:11,12).

Bakuidi banene ne Bafalese bakadi bakeba mushindu bua kushipa Yesu. Bakuidi banene bakasua kushipa Lazalo kabidi bualu bua Bena Yuda ba bungi bakadi bumuka kudibo ne bakitabuja Yesu bua dibika dia Lazalo ku lufu (Yone 11:47-48. 12:10,11).

Katueni ne mpata ne bena lukuna ba Yesu bakadi benzeshibue kudi Satana. Mukelenge Yesu wakambila bakuidi banene ne balombodi ba bantu pakayabo kumukuata mu Getesemane, ne, “Edi diba ndienu, ne bukokeshi bua midima” (Luka 22:53).

Yesu udi ubuela mu ntempelo

Yesu wakabuela mu ntempelo kadi pakatangileye malu onso akadimu, bualu bua diba diakamba kubuela, yeye wakalupuka, wakaya ne bayidi dikumi ne babidi ku Betania (Mako 11:11).

**“Nzambi ... wakamupa dina didi pamutu
pa dina dionso; ne bua mu dina dia Yesu binu bionso
bitue panshi ... ne bua ndimi yonso yambe bitoke ne
Yesu Kilisto udi Mukelenge, too ne ku butumbi
bua Nzambi Tatu” (Filipoi 2:9-11).**